

НАРОДНЫ НОВИНКЫ

р. XIX
ч. 9 – 12
19. марца 2009
ціна 0,20 €

КУЛЬТУРНО-СПОЛОЧЕНЬСКИЙ ТЫЖДЕННИК РУСИНІВ СР



• Погляд на дакотрых участніках 2. научнаго семінара карпаторусіністыкі 19. 3. 2009 на Пряшівській універсітэці. За чалны стіл засілі: (справа) ПэДр. М. Мальцовска, ПэДр. С. Конечні, к. н. і ПэДр. А. Плішкова, ПэД.

Єм Русіном ці Словаком?

Ай кідь беру од штату лем таку істу пенсію, як многы з нас, не сановала єм тото бідне евро і передплатила єм собі на рік 2009 вшыткы нашы русиньскы выдання, незалежно од того, хто їх выдає, бо хочу знати, што ся міджі нами Русинами на Словеньску і у світі дїє і як ся стараєме міджі собов в тім тяжкім світі жыти, розуміти собі і сполупрацовати міджі собов.

При чітаню многых статей мі сердце стискає якась велика безрадност, безнадій і біль за нас Русинів при здобываню і доказованю того, же сьме меншына людей, котра має мати свое достойне місце нелем на Словеньску, але у цілім світі.

Чом то Русины, яких характеризує шіре сердце, прекрасна культура і традиції, мусять неперестанно боєвати і вшыткыма можныма спосабыма доказовати через медіі, же суть **народом, котрый має свою богату історію і значіть має мати достойне місце міджі другыма народама на тій нашій прекрасній Землі?**

Лемже як роздумую, так роздумую, пришла єм на і єдну неприємну одповідь, а тов є **все іщі недостаток** глу-

бокого національного пересвідчіння многых Русинів о тім, же єм Русин, Русинка. Головно у людей, котры суть у чалных функціях русиньскых організацій, од найнизшых до найвысшых.

СПИСОВАНЯ ЛЮДЕЙ 2011

Ниякыма словама, ниякыма аргументама, ани тыма найкрасшыма і найпрываблівшыма русиньскыма акціями не пересвідчїме, наприклад, такого твердого русиньского „Українца“ яким є **Павло Богдан, Іван Лаба** і їм подобны, котры твердять, же **Союз русинів-українців на Словеньску** застрішує обидви народности – Русинів і Українців, покы мы ся за свою русиньску ідентічност будеме в кутику сердца ганьбити або бояти, і в урядных документах собі будеме писати народност словеньску з тым, же нас хтось колись „побаламутив“ і здерорьентовав... **Жаль, могла бы єм вказати пальцём на таких русиньскых функціонерів, котры твердять, наприклад, же нашто ся нам учіти русиньскый язык, кідь го знаме, бо сьме ся з ним народили...**

Мій погляд є такий, же **кідь хтось колись когось „побаламутив“ у 50-х роках минулого стороча, вже міг в р. 2001, а так само буде мочі в р. 2011 скінчіти свое блуджїня і написати собі свою праву народност.** А кідь так не чує у своїм сердцю і не хоче то зробити, потім не має право быти русиньскым функціонерём. Тадь, як такий націонално несформований чоловік може пересвідчїти нашого „поблуженого“ Русина о тім, же має свою велику ціну і свое місце на землі, де жыє!? Бо то потім вшытко вызерать лем як комедія і збыточно вышмарёваня пінязей.

Честну, чїсту, статечну, шіру, жертвенну русиньску роботу і культуру докаже міджі нашыма людми робити і зробити лем честный, шірый, жертвенный і на свій род гордый Русин.

Задумайме ся вшыткы над собов, над своєю честностю, покы будеме хотїти выслвити слова А. Духновича: **„Я Русин был, есьм і буду...“** Є то правдиве з нашого боку, або кламлемє своїх людей? Тримлю пальці вшыткым нам, абы сьме конечно досягли свое русиньске у вшыткых сферах нашого жывота!
Марія ГІРОВА, Снина

Сучасност і перспектївы Русинів очами історіка

Інштїтут русиньского языка і культуры Пряшівской універсітэты в Пряшові **19. марца 2009 зорганізовав другый семінар карпаторусіністыкі.** На нїм выступив історік Сполоченьсконаучного інштїтуту Словеньской академії наук в Кошіцях ПэДр. Станіслав Конечні, к. н. з темов **Русины на Словеньску в 20. сторочу.**

Станіслав Конечні ся выкумом історіі народностных меншын Русинів і Українців займає уж довгы рокы. На тоту тему опубліковав многы статей в домашніх і заграничных часописах, рішыв дакілько выкумных проєктів. Як сполуавтор написав 8 монографій і веце як 100 штудій і одборных статей. Як незавіслый історік – Словак – думаєме, же є найкомпетентнішым ученым, який може незаінтересовано высловлєвати погляды на русиньскый народностный і языковий вопрос.

Другый научный семінар карпаторусіністыкі сьме схосновали на то, жебы сьме С. Конечному поставили пару вопросів. Інтересовало нас – як ся він позерає і як оцінєвав у своїх публикаціях передреволючный жытот народностной меншыны, котру в тім часі звали **україньсков**, бо наїсто мав прїступ як історік к розлічным архівным матеріалам, котры му помогли створити собі обектвный погляд на дану проблематіку.

СЕМІНАРЬ КАРПАТОРУСІНІСТЫКІ

• **Пане докторе, в єднім із своїх рефератів, прїсвяченім Николаєві Бескидови, сьте конштатовали, же історіци суть „лем“ якасьма коментаторами розлічных історічных подій, то значіть, не мають вызначный вплив на формованя історіі. Дозволю сі але повісти, же якраз історіци суть тыма вызначныма людми, котры охабляють історічны сліды про наступны генерациі, бо неправильно або неправды інтерпретованы історічны події можуть мати і неблагоприятны наслідкы до будучности. Ясно, же каждый народ мав, а очівісно мате і днесь, тенденцію прикрашлєвати свою властну історію, вказовати ся наступным поколіням в тім найліпшійм світлі, хоць не все конкретный народ в конкретнім періоді дїспоновав тыма найліпшыма „лідрами“, котры бы в данім історічным моменті были способны зробити за свій народ тоты найліпшы рішїня. Мій вопрос ся дотыкає недавной історіі той народностной меншыны, котра перед новембровых революціов была означована як **україньска**. По революції ту але vznikли дві вызначны орьєнтації – русиньска і україньска. В чім, подля Вас, суть позітивна і недостаткы обидвох орьєнтацій в сучасності? Мала в тім історічным моменті народностна меншына, жыюча на северовыході Словеньска, лїдрів, котры правильно зареаговали на дану ситуацію? Як сьте вы особно інтерпретовали народностный жытот Русинів (тогды Українців) перед новембром 1989?**

– *Як в минулости, так і днесь в розлічных історічных моментах Русины, подобно як і други народы, ці уж бывшы або меншы, мусили рішати свої проблемы під тиском розлічных околностей. Подобно як і други народы, Русины мали своїх способнішых або менше способных лїдрів. Хотїло бы ся розаналізовати такы моменты з розлічных аспектів, но кідь бы єм мав одповісти просто, „Ахіловоє пятов“ Русинів як в минулости, так і днесь є выразна економічна одсталость регіону і з тым звязана їх міграція за ліпшым жытотом із своєї матерьской теріторії. Тот неприязный фактор нігда не дозволив наповно сконцентровати силы народа на свій властный розвиток – політичный, социальный, культурный. Приблизу ходем не так давну минулость – по р. 1945, коли много Русинів в рамках розлічных наборовых акцій оптовало на Україну, де „інвестовали“ свої силы і ум на розвиток чуджой державы. І хоць, правда, не вшыткы поважують Україну за чуджу державу, бо властно прихыленці етноніму „Русин-Українець“ мають амбіцію і днесь орьєнтовати свій культурно-народностный розвой якраз на Україну. Не є то планый погляд, бо є позітивне мати „за собов“ велику державу, котра буде підпоровати своїх родаків за граніцями, так як, наприклад мадыарську меншыну підпорує Мадыарско. Но в прїпаді Русинів є ситуація кус інакша, бо Україна николи не была їх матерьсков державою. Векшына з них ся не стотожила з україньсков ідентітов і культуров. (Продовжїня на 2. стор.)*

Комплексный план акцій перед списованєм жытельства

(Документ Русиньской оброды на Словеньску був предложеный єй председом і членом СРР Владиміром Противняком на засіданю Світової рады Русинів у Пряшові 13. фебруара 2009.)

Рік 2011 ся стане про нас Русинів вызначный і тым, же в Словенській републиці будє списованя жытельства. Міджі роками 1991 – 2001, кідь на Словеньску были першы пореволючны списованя людей, кількость Русинів наросла із 17 197 на 24 201 жытелів. Є то збївшїна о 40,7% і тотя кількость значіть, же Русины на Словеньску творяць 0,8% із вшыткых жытелів. (Позн.: В р. 1991 в листах списованя іщі не была уведжена самостатна колонка з русиньсков народностє, але люде подля інштрукцій комысарів списованя собі могли русиньску народность самы написати до вольной колонкы під вшыткыма уведжєныма народностями. Жаль, не вшыткы комысарі людем высвітпили, же так можуть зробити.)

В Пряшівскім краю русиньска меншына творить не 2,1%, але 2,7% жытельства, што є 21 150 людей. Але мы знаме, же в СР, окреме в Пряшівскім краю, жыє омного веце Русинів. Нажаль, не вшыткы собі свою русиньску ідентічност усвідомлюєме і не даєме то наяво при списованю жытельства. З неофіціальных жрїдел знаме, же Русинів на Словеньску може быти коло 120 000 або і веце! А зато, жебы сьме ся досправды приближыли к тому предпкладаному числу і жебы нас Русинів было штонайвеце і в офіціальных статістичных документах, **Русиньска оброда на Словеньску** (РОС) створила **Комплексный план акцій і кроків РОС на рокы 2009 – 2011 перед списованєм жытельства.** Подля выпрацованых пропозицій ведно з містныма організаціями РОС (МО РОС) поступно і розлічныма формами работы хочеме ословити вшыткых Русинів Словеньска, жебы не забывали на свій род, свое корїня і культурне богат-

ство наших предків, і жебы сьме русиньску народност і материньскый русиньскый язык ведно манїфестовали при наступнім списованю людей в р. 2011. Нашым кредом є: **Быти Русином не є ганьба, то є честь!**

Пропозиції:

1. Кажда МО РОС выпрацує властный план подля своїх представ, котрый будє заміранный на даный регіон. Выходимє з того, же каждая МО РОС найліпше знать, у чім є в тім регіоні сила, або наопак, што там треба выплїшыти ці приспособити даній шпецїфічній ситуації. Подля такого плану, вытвореного на регіоналнім прїнципі, будє каждая МО РОС поступно організовати свої активносты, при котрых будє мати на памяти тот важный акт, котрым є списованя жытельства.

2. Тїсно сполупрацовати із старостами сел і прїматорами міст. До комісій на списованя жытельства рекомендувати активных членів РОС і інших русиньскых організацій. Прїправити і наїнштатовати пропагачны таблы на видных місцях і брати участь в організованих акціях.

3. Ословити священників на селах, председу *Общества св. Йоана Крестителя* (о. Ярослав Поповець), шефредактора часопису *Артос* (о. Мілан Ясик) і інших представителів русиньскых організацій і з ними координувати роботу так, жебы ведно і з єднотныма замірами сьме выкочіли за планованым цілём, який поведе к успіху Русинів при списованю жытельства. В рамках того взаємно ся подїляти на забезпечованю пропагачных матеріалів (плагатів, летаків, одзнаків, календарів і т. п.).
(Продовжїня на 2. стор.)

